



ATASSUT

UKA15/96

Steen Lynge

17.11.2015

**Siunnersuisoqarfimmik inunnik akiitsoqartunik siunnersuisinnaasumik ikiuisinnaasumillu pilersitsinissamut periarfissat pillugit nalunaarusiornissaq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunertaasussaq tassaavoq akiitsut annikillisarniarlugit immikkut ilisimasallit ikiortigalugit akiitsoqartunik akeqanngitsumik siunnersuisarnissaq. Nalunaarummi taamatut siunnersuisoqarfimmi suliasat suuneri aammalu immikkut ilisimasallit tassunga iluaqutigineqarsinnaanersut nassuiarneqassapput, kiisalu taamatut siunnersuisoqarfiornerup ingerlanneqarnera Landskarsimut qanoq ukiumut akeqarumaarnersoq. Nalunaarusiaq 2016-imi ukiakkut ataatsimiinnissaq sioqqullugu naammassereernejarsimassaaq.**

(Inatsisartunut ilaasortaq Naaja Nathanielsen, Inuit Ataqatigiit)

Siunnersuineq, ilitsersuineq ilinniartitaanerlu tassaapput innuttaasut akisussaaffiinut pisinnaatitaaffiinullu qaammaasaqarnerulernissamut aqputissiuussisussat.

ATASSUT-mit siunnersuut soqutiginarlipparput, taamatummi nalunaarusiornerup takutissinnaammagu qanoq inuiaqatigiinnut taamatut innuttaasut aningaasaqarnermigut akiitsoqarnerminnit qaangiisinnaanissamut siunnersuisoqarfiup inuiaqatigiinnut iluaqutaasinnaanera saqqummersinneqarniassamat.

ATASSUT-mit innuttaasut akiitsoqarnerminnit qaangiisinnaanissamut siunnersuisoqalernissaanut isumamaq soqutiginaruutippaa aammalu Kalaallit Nunaanut soqutiginaruutillugu, nunanit allaniit misilittagaalluurtut atorluarsinnaaneri eqqarsaatigalugit – naak periaatsit aatsaat Kalaallit Nunaannut tulluarsaqqaarneqartariaqartut – taamaattoq akiitsoqalersimanermiit qaangiiniarneq qanoq ilinniarsimassutsimut tunngaqqissaarunangikkaluartoq.

Tassa ilisimaneqarpoq innuttaasut kalaallit amerlasoorpassuit akiitsoqartutut inissisimaneri, innuttaasut amerlasuut pisortanut akiitsoqarneri peqqutaalluni. Aamma isertorneqarsinnaanngilaq innuttaasut ataasiakkaat pisortanut akiitsoqarnerup saniatigut aamma allanut akiitsoqarsinnaasarneri. Pisuni arlalinni takuneqartarpoq innuttaasut pisortanut akiitsoqarneri isertitakinnermik imaluunniit ineqarnermut akiliutinut tapiissutisisannginnerinut tunngaveqannginneri.



Piffissaatillugu isumatusaarneq

Naak innuttaasut akiliisinnaassuseqaraluartut aamma piumassuseqaraluartoq, taamaattoq innuttaasup aningaasaqarnermut inissisimanerminik takunnissinnaanera iliuuseqarnissamullu piffissaagallartillugu sakkusaqarnermik amigaateqarsinnaaneranik aallaaveqarsinnaavoq. Taamatut aningaasaqarnikkut inissisimanerminnik inuuttaasut takunnissinnaalersinnaanissaat, inuiaqatigiinni siunnersuisoqarfimmik pilersitsinikkut ikiorserneqarsinnaanera inuiaqatigiinnut iluaqutaasinnaavoq. Arlalitsigut innuttaasup akiitsoqarnerminik qaangiisinnaaneranik kinguneqarsinnaavoq aammalu siunissami taamatut akiitsuneqqinnissamut pinaveersimatitsisinnaalluni.

Immaqa ilaatigut aperisoqarsinnaavoq - aningaaseriviit aammalu suliffeqarfiit namminersortut tamanna isumagisassarinnnginnerpaat? ATASSUT-mit isumaqarpugut ataatsimut isiginiassagaanni, namminersortunit tamanna isumagineqarsinnaasut, kisianni namminersorlutik inuutissarsiutillit pisussaaffingngilaat taamatut siunnersuisarfimmik pilersitsinissaq.

Pisortanut taama amerlatigisunik innuttaasut akiitsoqarnerisa takutippaat, inuiaqatigiinni pisariaqartitsinerusoq, innuttaasut akiitsoqarnerminnit qaangiiniarnissamut siunnersorneqarnissamik ilitsersorneqarnissamillu periarfissaqarnissaat.

Taamatut ATASSUT-mit oqaaseqarluta taperserparput Naalakkersuisut peqquneqassasut siunnersuisoqarfimmik, innuttaasunik siunnersuinissamut aammalu inuit aningaasaqarnerminni akiitsullit ikiorneqarnissaanut pilersitsinissamut periarfissat pillugit nalunaarusiamik suliaqartinneqarnissaat. ATASSUT-mit taamaasilluta siunnersuutip ataatsimiitsitaliamut susassaqartumut suliarineqarnissaa innersuussutigissavarput.

Oqaaseqarsinnaaninnut qujanaq!